

# Céad Litir Naomh Pól chuig na TEASALÓNAIGH

## Beannú

**1** Pól agus Silveánas agus Tiomóid ag beannú d’eaglais na dTeasalónach, i nDia an tAthair agus sa Tiarna Íosa Críost. Grásta chugaibh agus síocháin.

## Creideamh na dTeasalónach

<sup>2</sup>Ní stadaimid ach ag gabháil buíochais le Dia mar gheall oraibh uile agus ag cuimhneamh oraibh gan staonadh inár n-urnaithe. <sup>3</sup>Cuimhnímid i láthair Dé, ár nAthair, ar a bhríomhaireacht atá bhur gcreideamh, ar a dhíchealláí atá bhur ngrá agus ar a sheasmhacht atá bhur ndóchas as ár dTiarna Íosa Críost. <sup>4</sup>A bhráithre, a bhfuil gnaoi Dé oraibh, tá a fhios agaibh mar a roghnaigh sé sibh; <sup>5</sup>mar ní le briathra béil amháin a tháinig ár ndea-scéal chugaibh ach le cumhacht agus le lándeimhniú an Spioraid Naoimh. Agus tá a fhios agaibhse mar a thugamar ár saol, fad a bhíomar in bhur measc, ar mhaithe libh. <sup>6</sup>Agus rinne sibhse aithris orainn agus ar an Tiarna, mar d’ainneoin gach anacra ghlac sibh leis an mbriathar uainn le lúcháir an Spioraid Naoimh, <sup>7</sup>sa tslí go raibh sibh mar



shampla ag a bhfuil de chreidimhgh sa Mhacadóin agus in Acháia. <sup>8</sup>Mar is uaibhse amach a leath briathar Dé, agus ní sa Mhacadóin agus in Acháia amháin é, mar tá scéal bhur gcreidimh i nDia scapthe san uile áit, i dtreo nach gá dúinne aon ní a rá faoi. <sup>9</sup>Tá na daoine féin ag cur síos ar an bhfáilte a chuir sibh romhainn agus mar a chas sibh ar Dhia ó na déithe bréige chun dul ag seirbhís don fhíorDhia beo <sup>10</sup>agus chun feitheamh lena Mhac Íosa a theacht ó na flaithis – an Mac a thóg sé ó mhairbh agus atá dár bhfuascailt ón bhfearg atá le teacht.

## Saothar Phóil i dTeasaloinicé

**2**Tá a fhios agaibh féin, a bhráithre, nárbh aon turas in aistear ár gcuart oraibh. <sup>2</sup>Bhí drochíde agus tarcaisne faighte i bhFilipí againn roimhe sin, mar is eol daoibh, ach fuaireamar de mhisneach ó Dhia a dheas-scéal a fhógairt daoibhse d'ainneoin fhreasúra láidir. <sup>3</sup>Ní mearbhall aigne ná drochintinn a bhí dár spreagadh ná ní ag iarraidh daoine a mhealladh a bhíomar; <sup>4</sup>ach de bhrí gurbh fhiú le Dia sinn a dheas-scéal a chur inár gcúram, craolaimid é dá réir, ní d'fhonn daoine a shásamh ach d'fhonn Dia a shásamh, mar is eisean a phromhann ár n-intinn. <sup>5</sup>Agus mar is eol daoibh féin, ní dhearnamar plámás libh riamh, <sup>6</sup>agus tá a fhios ag Dia nach ar scáth na sainte a bhíomar ag obair ná ag lorg molta ó dhaoine, uaibhse ná eile, <sup>7</sup>cé go bhféadfaimis bheith teann oraibh mar thoscairí ó Chríost. Ach bhíomar chomh séimh, fad a bhíomar in bhur measc, le banaltra ag muirniú a páistí. <sup>8</sup>Bhíomar chomh ceanúil sin oraibh go rabhamar sásta ní amháin an deas-scéal a roinnt oraibh ach ár n-anam féin a roinnt oraibh chomh maith, agus a ansa linn a bhí sibh.



<sup>9</sup>Is cuimhin libh, a bhráithre, an saothar agus an sclábhaíocht a rinneamar; mar a bhímis ag obair de lá is d'óiche ar eagla go mbeimis inár muirín ar dhuine ar bith agaibh le linn dúinn dea-scéal Dé a chraobhscaoileadh daoibh. <sup>10</sup>Tá a fhianaise oraibh féin agus ar Dhia go rabhamar ionraic macánta neamhurchóideach libhse, a bhfuil an creideamh agaibh. <sup>11</sup>Mar is eol daoibh, bhíomar le gach duine agaibh mar bheadh athair lena pháistí, <sup>12</sup>do bhur spreagadh agus do bhur misniú, agus ag agairt oraibh bhur saol a thabhairt mar is dual de réir Dé atá ag glaoch oraibh isteach ina ríocht ghlórmhar féin.

<sup>13</sup>Agus tá cúis eile againn le bheith ag gabháil buíochais gan staonadh le Dia: de bhrí, nuair a ghlac sibh le briathar Dé a chuala sibh uainn, nach mar theachtaireacht dhaonna a ghlac sibh é ach mar bhriathar Dé, agus sin é go díreach an rud atá ann dáiríre, mar is é Dia atá ag obair ionaibhse a bhfuil an creideamh agaibh. <sup>14</sup>Tá sibhse, a bhráithre, ag leanúint lorg eaglaisí Dé atá in Íosa Críost ar fud Iúdáia; mar tá an íde chéanna faighte agaibhse ó bhur gcomhthírigh agus a fuair siadsan ó na Giúdaigh, <sup>15</sup>ón mbuíon chéanna a d'imir bás ar an Tiarna Íosa agus ar na fáithe agus a rinne géarleanúint orainne. Níl Dia buíoch díobh, áfach, agus is naimhde iad don chine daonna, <sup>16</sup>mar go bhfuil siad ag cur bac orainne labhairt leis na gintlithe d'fhonn is go slánofaí iad. Sa tslí sin tá siad ag cur barr ar a bhfuil de pheacaí déanta acu riamh anall; ach tá fearg Dé tagtha suas leo faoi dheireadh.

## Fonn ar Phól na Teasalónaigh a Fheiceáil

<sup>17</sup>Maidir linn féin, a bhráithre, ní rabhamar scartha libh ach tamall beag aimsire – as raon ár súl a bhí sibh ach ní as raon ar gcroí – nuair a tháinig dúil rómhór orainn bhur



ngnúis a fheiceáil arís. <sup>18</sup>Bhí fonn orainn teacht chugaibh – ba mhian liomsa, Pól, teacht chugaibh arís agus arís eile – ach choisc Sátan orainn é. <sup>19</sup>Tar éis an tsaoil, cén t-ábhar dóchais agus áthais atá againn ach sibhse? Cén chraobh a bheidh againn le maíomh aisti os comhair an Tiarna Íosa Críost, nuair a thiocfaidh sé, ach sibhse? <sup>20</sup>Sea, is sibhse, go deimhin údar ár mórtais agus ár lúcháire.

## Misean Thiomóid

**3** Dá chionn sin nuair nár fhéadamar é a sheasamh a thuilleadh, shocraíomar go bhfágfaí sinn féin inár n-aonar san Aithin, <sup>2</sup>agus sheolamar chugaibhse ar mbráthair Tiomóid, fear atá ina chúntóir ag Dia i bhfógairt dea-scéal Chríost. Sheolamar chugaibh é chun sibh a dhaingniú agus a neartú in bhur gcreideamh, <sup>3</sup>ar shlí nach suaithfí aon duine agaibh le trioblóidí na huaire. Tá a fhios agaibh féin gurb é seo an rud atá ceaptha dúinn.

<sup>4</sup>Dúramar libh cheana, fad a bhíomar in bhur measc, go raibh ciapadh i ndán dúinn; rud a tharla mar is eol daoibh. <sup>5</sup>Sin é an fáth nár fhéad mé é a sheasamh a thuilleadh agus ar chuir mé teachtaire ag triall oraibh ag cur tuairisc bhur gcreidimh ar eagla go mbeadh an cathaitheoir tar éis an cathú a chur oraibh agus go mbeadh ár saothar in aisce againn.

<sup>6</sup>Nuair a tháinig Tiomóid ar ais chugainn uaibh anois beag, áfach, is é an scéal maith a bhí aige dúinn ar bhur gcreideamh agus ar bhur ngrá. D'inis sé dúinn go mbíonn sibh ag cuimhneamh go ceanúil orainn i gcónaí agus go bhfuil sibh chomh mór ag tnúth lenár bhfeiceáil agus atáimidne libhse. <sup>7</sup>Mar sin de, a bhráithre, ba mhór an tógáil chroí dúinn bhur gcreideamhsa i lár ár gcuid angair agus ár gcuid anacra, <sup>8</sup>mar gur beo dúinne anois



nuair atá sibhse ag seasamh an fhóid go daingean sa Tiarna. <sup>9</sup>Cén buíochas is féidir dúinn a ghabháil le Dia as a bhfuil de lúcháir curtha orainn agaibh os comhair ár nDé? <sup>10</sup>Bímid á ghuí go dúthrachtach de lá is d'óiche go bhfeicfimid bhur ngnúis arís agus, cibé bearna atá ar bhur gcreideamh, go líonfaimid í. <sup>11</sup>Go ndéana Dia, ár nAthair, agus Íosa ár dTiarna, ar mbóthar chugaibh a réiteach dúinn. <sup>12</sup>Agus go ndéana an Tiarna bhur ngrá dá chéile agus do chách eile a mhéadú go fras nó go mbeidh sé ar aon chéim leis an ngrá atá againne daoibh. <sup>13</sup>Agus go ndaingní sé bhur gcroíthe sa naofacht sa tslí go mbeidh siad gan cháim os comhair Dé, ár nAthair, ar theacht dár dTiarna Íosa agus a chuid naomh in éineacht leis.

## Naofacht agus Grá

**4** Rud eile de, a bhráithre, fuair sibh le fios uainne – conas ba chóir daoibh bhur saol a thabhairt chun Dia a shásamh agus tá sibh ag déanamh amhlaidh cheana. Táim á iarraidh d'achainí anois oraibh in ainm an Tiarna Íosa, déanamh níos fearr fós. <sup>2</sup>Tá a fhios agaibh cad iad na teoracha a thugamar daoibh ar údarás an Tiarna Íosa. <sup>3</sup>Is é is toil le Dia go mbeadh sibh naofa, go seachnódh sibh an drúis, <sup>4</sup>go dtuigfeadh gach duine agaibh conas a chorp a choimeád go naofa agus faoi urraim <sup>5</sup>agus gan a bheith tugtha do na paisin ainrianta ar nós na bpágánach nach bhfuil aon aithne ar Dhia acu; <sup>6</sup>gan éagóir ná calaois a dhéanamh ar bhráthair i gcúis dlí, mar go n-agraíonn an Tiarna na nithe sin uile ar dhaoine faoi mar a dúramar agus mar a dhearbhaíomar daoibh cheana. <sup>7</sup>Ní chun na neamhghlaine a ghlaigh Dia sinn ach chun na naofachta. <sup>8</sup>Más ea, an té a dhiúltaíonn



don teagasc seo, ní do dhaoine a dhiúltaíonn sé ach do Dhia a thugann a Naomh-Spiorad daoibh.

<sup>9</sup>Maidir leis an ngrá bráthar ní gá aon ní a scríobh chugaibh ina thaobh mar go bhfuil teagasc faighte agaibh féin ó Dhia i dtaobh grá a thabhairt dá chéile. <sup>10</sup>Sin é go díreach atá á dhéanamh agaibh do na bráithre uile ar fud na Macadóine. Ach táimidne á iarraidh oraibh, a bhráithre, déanamh níos fearr fós, <sup>11</sup>agus é bheith ina aidhm agaibh saol suaimhneach a chaitheamh, bhur ngnó féin a dhéanamh agus oibriú le bhur lámha féin de réir mar a dúramar libh cheana. <sup>12</sup>Sa tslí sin beidh meas ag na díchreidmhigh oraibh agus ní bheidh sibh ag brath ar dhuine ar bith.

## Téarnamh an Tiarna Íosa

<sup>13</sup>Níor mhaith liom, a bhráithre, go mbeadh sibh aineolach i dtaobh na marbh i dtreo nach mbeadh sibh dobrónach ar nós na ndaoine eile atá gan aon dóchas. <sup>14</sup>Creidimid go bhfuair Íosa bás agus gur aiséirigh sé; ar an gcuma chéanna an mhuintir a fuair bás i bpáirt le Críost, tabharfaidh Dia iad siúd leis ón mbas chomh maith. <sup>15</sup>Agus tá an méid seo le rá againn libh ar fhocal an Tiarna féin: an méid a fhágfar beo dinn go dtí teacht an Tiarna, ní bheidh aon bhuntáiste againn orthu sin a bheidh tar éis bháis: <sup>16</sup>mar nuair a thabharfar an fógra le glór an ardaingil agus le trumpa Dé, tiocfaidh an Tiarna féin anuas ó neamh agus ar dtús éireoidh na mairbh i gCríost. <sup>17</sup>Ansin an méid a bheidh fágtha beo dinn, ardófar chun siúil sinn mar aon leo trí na néalta in airicis an Tiarna sa spéir, agus ar an gcuma sin beimid i dteannta an Tiarna go deo. <sup>18</sup>Déanaigí a chéile a mhisniú, más ea, leis na briathra sin.



5 Maidir le hamanna agus uaineacha, a bhráithre, ní gá scríobh chugaibh ina dtaobh. <sup>2</sup>Tá a fhios agaibh féin go beacht gur mar a bheadh bithiúnach san oíche a thiocfaidh an Lá úd an Tiarna. <sup>3</sup>Nuair a bheidh daoine á rá: “Táthar slán sábháilte,” ansin gan choinne is ea a thiocfaidh an tubaiste, mar a thagann an tinneas ar bhean atá trom, agus ní bheidh aon éalú acu uaithe. <sup>4</sup>Ní sa dorchacht atá sibhse, áfach, a bhráithre, go dtiocfadh an lá úd aniar aduaidh oraibh mar a bheadh bithiúnach. <sup>5</sup>Is clann an tsolais sibhse go huile, clann an lae. Ní leis an oíche ná leis an dorchacht sinn. <sup>6</sup>Ná bímis inár gcodladh, dá bhrí sin, ar nós daoine eile, ach bímis inár ndúiseacht agus ar ár gciall. <sup>7</sup>Istoíche is ea a chodlaíonn na codlatánaigh agus istoíche a bhíonn na meisceoirí ar meisce. <sup>8</sup>Ach ós den lá sinne, fanaimis ar ár gciall; cuirimis umainn an creideamh agus an grá mar lúireach agus dóchas ár slánaithe mar chafarr. <sup>9</sup>Ní hí an fhearg atá ceaptha dúinn ag Dia ach go mbainfimis ár slánú amach trínár dTiarna Íosa Críost, <sup>10</sup>a fuair bás ar ár son chun go mbeimis beo ina theannta, cibé acu beo nó marbh dúinn. <sup>11</sup>Dá bhrí sin, leanaigí ag spreagadh a chéile agus ag treisiú le chéile faoi mar atá sibh a dhéanamh cheana.

## Comhairle Dheireanach

<sup>12</sup>Iarraimid oraibh, a bhráithre, ómós a thabhairt dóibh siúd atá ag saothrú go dian in bhur measc agus atá do bhur stiúradh in ainm an Tiarna agus atá ag tabhairt comhairle daoibh. <sup>13</sup>Bíodh meas agus cion as cuimse agaibh orthu mar gheall ar a gcuid oibre.

<sup>14</sup>Mairigí le chéile go síochánta. Impímid oraibh, a bhráithre, foláireamh a thabhairt do na daoine neamhchúiseacha, na daoine faiteacha a spreagadh, cabhrú leis na laga agus



bheith foighneach le cách uile. <sup>15</sup>Féachaigí chuige nach ndéanfaidh aon duine agaibh an t-olc in aghaidh an oilc. Cuirigí romhaibh an mhaith a dhéanamh i gcónaí dá chéile agus do chách eile. <sup>16</sup>Bíodh lúcháir oraibh i gcónaí. <sup>17</sup>Bígí ag guí gan staonadh <sup>18</sup>agus ag gabháil buíochais as gach ní; sin é an ní is áil le Dia uaibh in Íosa Críost. <sup>19</sup>Ná múchaigí an Spiorad; <sup>20</sup>ná déanaigí neamhshuim de na ráite fáidhiúla. <sup>21</sup>Déanaigí gach ní a thástáil; cloigí leis an maith <sup>22</sup>agus seachnaigí gach aon sórt oilc.

<sup>23</sup>Go ndéana Dia na síochána féin, sibh a naomhú go smior; agus go gcoimeádtar slán gan locht sibh idir spiorad agus anam agus chorp i gcomhair theacht ár dTiarna Íosa Críost. <sup>24</sup>Mar is intaofa an té úd atá ag glaoch oraibh agus déanfaidh sé é sin. <sup>25</sup>A bhráithre, bígí ag guí orainne chomh maith. <sup>26</sup>Beannaigí do na bráithre uile leis an bpóg naofa. <sup>27</sup>Cuirim oraibh as ucht an Tiarna an litir seo a léamh do na bráithre uile. <sup>28</sup>Grásta ár dTiarna Íosa Críost go raibh agaibh.

